

REGIONAL NEWS BULLETIN

HEADLINES (MORNING)

1. Hmeichhiate hriselna tura hmalakna Swasth Nari, Sashakt Parivar Abhiyan leh Rastriya Poshan Maah Campaign 8-na chu Mizoramah hlawhtling taka kalpui a ni.
2. Lungleia Dist Agriculture Office a thawktute chuan khaw hrang hrangah lo neitute nen Sazu hrai hna an thawk.
3. Sawrkar laipui chuan naupang khuh damdawi pek chungchangah state leh UT te fimkhur turin a hriattir.
4. Prime Minister Narendra Modia chuan vawiin hian New Delhi-ah thalaite lamhawi hmasawna cheng vaibelchhe sing 6 leh sang 2 chuang hu a hawng dawn.

<><><>

SWASTH NARI

Ram puma Swasth Nari, Sashakt Parivar Abhiyan leh Rastriya Poshan Maah Campaign 8-na Prime Minister Pu Narendra Modi-a'n Dhar, Madhya Pradesh atanga a hawn chu zawhfel a ni ta. Mizoram-ah pawh Prime Minister-i'n a hawn rual hian Larsap General (Retd) Vijay Kumar Singh ah a hawng a ni.

He programme hlawhtling taka kalpui a nih hnuah khar a nih takah hian Health & Family Welfare Minister, Pi Lalrinpuii chuan ram chhung hmun dang ruala hmeichhiate hriselna tur campaign pawimawh tak Swasth Nari Sashakt Parivar leh Poshan Maah Mizorama kalpui a nih danah thawktu te thawhrimna leh taimakna a fak thu sawiin mipui ten hlawkna an chan ngei a duhsak thu a sawi a. Campaign hlawhtling taka neih a nih avangin VC/LC, NGO leh Kohhrante thawhpuiina leh tanruapuina ah lawmthu a sawi bawk.

NHM Mission Director Dr. Lily Chhakchhuak chuan Swasth Nari, Sashakt Parivar campaign-in a tum ber chu chhungkaw nu ber atanga tana hriselna bultan a ni a ti a. Hemi hnuaiha hian September ni 17 atanga October ni 2 chhung hian hmeichhiate hriselna lam hawi campaign kalpui niin, Hospital hrang hrang, Health & Wellness Centre leh Health Sub-Centre-ahte health camp leh check-up neih a ni a. PMJAY, PMMVY leh Nikshay Mitra enrollment kalpui a ni a, Ayushman Bharat Health Account (ABHA) ID siam a ni bawk. Naupang vaccine pek, BP sang, zunthlum, hnute cancer, anaemia leh TB vei zawn chhuah bakah AYUSH awareness, Oral health leh Blood donation camp-te buatsaih a ni a. 8th Rastriya Poshan Maah kaltlangin nu leh naupangte hriselna nan hmalakna hrang hrang nasa kalpui a ni bawk.

He Campaign chhung hian Health Camp wawi 4224 neih a ni a, Special Camp wawih 627 neih a ni bawk. Campaign chhung hian Mipui 73,847 te hriselna endik niin heng zinga 38145 te chu hmeichhia an ni. He Camp chhung hian hetiang hian Natna chi hrang hrang an vei leh veiloh endik an ni.

He campaign chhung hian PMJAY/Vay Vandan Cards (Health Card) mi 1645 hnenah pek chhuah a ni a, Blood Donation Camp hmun hrang hrangah neih niin Thisen Unit 1753 pek a ni a. Campaign-ah hian Government Institution te pawhin Health Camp hmun hrang hrangah an huaihawt bawk.

(DIPR)

<><><>

RASHTRIYA POSHAN MAAH

Nu leh naupang tana chaw tha inzirtirna, Poshan Maah chu Mizorama Anganwadi Centre hrang hrangah September thla chhung khan hman a ni.

Poshan Maah chungchanga Akashvani Aizawl in a kawmnaah, Mizoram Women and Child Development Department Deputy Director Pi Sailopari chuan Poshan Maah chu sorkar laipuia Ministry of Women and Child Development in a duan a ni tih sawiin, he programme in a tum ber chu naupang than thu, naupang an san zawng en a cher leh lutuk, naupang thang tha lo, leh thisen tlakchhamna tihlem te a ni a ti a, September thla chu ei leh in chungchanga inzirtirna beihpui thlakna thla a nih angin Mizoram hmun hrang hrangah pawh Poshan Maah hman a ni a ti a, Pi Sailopari chuan Mizoram khaw hrang hranga Anganwadi Centre-ah naupang kum 3 atanga kum 6 inkarte hnena inzirtirna tur, thiam bul tanna bu siam a ni a, eitur leh damdawi tha te an sem bawk thin tih sawiin, nu pum chhung a naute a insiam atanga kum 2 a nih thleng chu mihring huna hun pawimawh ber a ni a, hemi hunlai hian nu pawhin iron leh calcium tiamin damdawi leh eitur tha a ei a pawimawh hle a, naute a lo piana thla 6 a nih thlengin nu hnute tui

chauh hmanga chawm chu a tawk a ti a, thla 6 a tlin hnu atangin chaw pangngai thei leh thlai her dip eitir a tha hle tih a sawi.

<><><>

PHC

Rampuma Sawrkar damdawiin tha tehnaah Primary Health Centre pathum a tling thar a, heti hian Mizoram chhunga Health and Wellness Centre -PHC 57 target zinga 34-in National Quality Assurance Standard (NQAS) certificate an nei tawh a ni.

National Health Mission, Mission Director Dr. Lily Chhakchhuak chuan India rama sawrkar damdawi in tha bik tehna, National Quality Assurance Standards (NQAS)-a tling thar Phullen PHC, Hnahlan PHC, leh Reiek PHC te hian 100-a 90.68, 93.36, leh 90.76 te an hmu a tih a sawi.

(Dr Lily Byte)

Reiek PHC hi Aspirational Block Programme (ABP) hnuai mi niin ABP hnuai hian target pasarih awmin State certified 5 (panga) leh National certified 4 (pali) an awm mek a ni.

Health Minister Pi Lalrinpui pawhin lawmawm a tih thu sawiin, heng NQAS certified sawrkar damdawi in kan neih te hi mipuite'n an hman tangkai thiam a pawimawh hle tih a sawi a ni.

Heti hian Mizoram chhunga Sawrkar damdawi in 47 te chu NQAS national certificate nei tawh an ni a. Tunah hian sawrkar damdawi in 19 leh HWC Sub-Centre 21-in state level certificate nei mekin national certificate result nghak mek 4 an awm bawk a ni.

National Quality Assurance Standards (NQAS) certified damdawi in te hi endikna chhawng thum paltlang an ni a, a tawp bera endikna an hmachhawn hi National External Assessment a ni a, state pawn atangin Assessor an lo kal thin a ni. Hetah hian 100-70 an hmuh chuan certified an ni chauh thin. Heng certified tawh damdawi inah te hian natna darh thei ven kawngah te, thawktu zawng zawngte an hna bil an thiamna te, an level zelah enkawlna an pek that dan te, a thlawna enkawlna leh damdawi pek te, damdawi in faina leh dik taka damdawi in bawhlhlawh sawngbawl te, hawihawmna leh a chhehvel vawnfai kawngah te, environment vawn that kawngah te endik an ni.

(CORR: Nuteii)

<><><>

LUNGLEI RODENT MASS POISONING

Lungleia Dist Agriculture Office a thawktute chuan nimin khan khaw hrang hrangah lo neitute nen Sazu hrai hna an thawk a Mamte khua erawhin Sazu hrai an duhlo.

Dist Agriculture Office Lungleia thawktute hi Pu Vanlalabela ADAO hova thawk chhuakin Tawpui North-I, Mualcheng South, Thingfal, Mamte leh Thlenganga lo neitute buh Sazu in a seh chhiat sakna hmunte tlawhin Sazu in an buh leh thlaite a seh chhiat zel loh nan lo neitute nen hian tur hmangin Sazu hrai hna an thawk a heng khua an tlawhah te hian tunhnai khan Sazu puangin tharrang buh thahnem tak an eichhe tawh a ni.

Heti a nih avang hian Dist Agriculture Office Lungleia thawktute chuan a hmunah hian kalchilhin an buh leh thlai Sazu in a ei chhiat dan an enfiah bakah Sazu tur hmanga hrai hna lo neitute nen an thawk nghal a ni.

(BYTE)

Hetihlai hian Mamte khua leh Thlengang khuaa chhungkaw pasarih te tih loh chuan buh seng a hun mai dawn avang leh riak luta buh seng angaih dawn avangin lo lama an ei leh in tur thlai leh tui tlan tur laka an him zawk theih nan buh sehtu Sazu hrai chu tha an tilo tih Agriculture Department thawktute hi hrilhin Department a thawktute pawhin an duhlo chung chu an tih luih theih a niloh thu an sawi a ni.

Mamte khuaah hian In 134 vel awmin chhungkaw 47 velin thlawhhma an la a chhungkaw 7 te buh chu Sazu hian a seh chhiat sak tawh a, Thlengang khuaah hian chhungkaw 50 awmin chhungkaw 40 in thlawhhma an la a, chhungkaw 7 te chauhin Sazu hrai hi an duh a Agriculture Deptt a thawktute hian Sazu an hraina turte chu ruah laka him tura dah dan an zirtir nghal a ni.

(Thangmingliana Lunglei PTC)

<><><>

EDUCATION MINISTER

Education Minister Dr. Vanlalhlalan lamah zirna sang zawkah Mizoram chu che thain, school education lamah thung chuan tun hnaia Ministry of Education-in Performance Grading Index 2.0 report a tlangzarhah Mizoram chu a tichhe berte zingah a tel a ti.

Nimina Aizawl City College Joint Students' Union (ACCJSU) kum 25 tlin lawmna hun chu Lalthanhawla Auditorium-a a hmanpuinaah he thu hi sawiin Minister chuan tun hnaia National Institutional Ranking Framework (NIRF) ranking-ah Mizoram University (MZU) leh Pachhunga University College (PUC)-te thleng sang mah se school education lamah tun hnaia Ministry of Education-in Performance Grading Index 2.0 report a tlangzarhah Mizoram chu a tichhe berte zingah a tel a ti a. All India Service-a inziak tling kan neih lohna a rei tawh thu tarlangin, he'ng harsatnate leh zirlaite dawmkan dan tur zirchianga, zirna siamtha turin NITI Aayog nen an indawr tih a sawi a ni.

Minister chuan zirlaite hamthatna atana sawrkarin hma a lakte tarlangin, kum tam tak luah theih loh NIT Mizoram Lengpui Campus chingfel turin cheng vbc .10 an pek tawh thu leh forest clearance nghah mek a nih thu te, Mizoram Engineering College-ah pawh industry mila syllabus neih an tum thu te, State University atana Registrar leh Vice Chancellor lakna tur search committee din chhoh a nih tur thu te a sawi a. An sawrkar hnuah college sakthatna

tur PM-USHA leh SASCI atangin cheng vbc. 100 chuang an dawn tawh thu te, Aizawla college-ho insem tur cheng nuai 1000 vel an dawn thu te, college fee ennawn mek a nih thu te a sawi a.

ACCJSU chu kum 2000-a din a ni a. An silver jubilee lawmna pualin intihsiakna hrang hrang huaihawt a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

COUGH SYRUP

Sawrkar laipui chuan naupang khuh damdawi pek chungchangah state leh UT te fimkhur tura hriattirna a pe. Union Health Ministry chuan khuh leh hritlang damdawite chu naupang kum hnih hnuai lamah pe lo turin thurawn a pe a. Heng damdawite hi kum 5 hnuai lamah chuan pek loh tur anih thu sawiin an lo pe anih chuan uluk taka an dinhmun vil zui a, dose diktak pe turin a ti a. Naupang hritlang khuh nei thinte chu khuh damdawi ei lo pawhin an dam leh mai thin thu Union Health Ministry chuan a sawi a. Hetianga sawrkarin thu a chhuah na chhan hi tunhnaiah Madhya Pradesh-a naupang khuh damdawi ei avanga thihna thleng a awm vang a ni a. Sarwkar chuan he thihna thleng chungchangah hian National Centre for Disease Control, National Institute of Virology leh Central Drugs Standard Control Organisation aiawhte Madhya Pradesh ah hian a tirlut nghal a ni.

(Newsonair)

<><><>

DEFENCE MINISTER

Defence Minister Rajnath Singh-a chuan kum 2029 ah chuan India in ramdanga ralthuam a thawnchhuah chu cheng vaibelchhe sing 5 chuang hu a tling tawh ang a ti. Tun dinhmunah cheng vaibelchhe sing 2 leh sang 4 hu thawnchhuah mek anih thu sawiin kum 11 kalta kha chuan cheng vaibelchhe 600 hu chauh thawnchhuah a ni a ti a. Ni thum aw haw tur Jain International Trade Organisation -JITO Connect Exhibition a hawnaah he thu hi sawiin India chu khawvela ralthuam siamna hmunpui a ni chho mek a ni a ti.

(Newsonair)

<><><>

PM

Prime Minister Narendra Modia chuan vawiin hian New Delhi-ah thalaite lamhawi hmasawna cheng vaibelchhe sing 6 leh sang 2 chuang hu a hawng dawn. Vawiina PM Modia hawn tur zingah hian thalaite thiamthil hmasawna tur PM-SETU hnuai ramchhunga sawrkar ITI sang chuang tih changtlunna turte a tel a. Hei bakah hian Bihar in a lo tihtawp tawh thalai graduate te hnenah thla tin cheng sangkhat pekna scheme Mukhyamantri Nischay Swayam Sahayata Bhatta Yojna pawh a hawng dawn baw k a. Bihar-a Jan Nayak Karpoori Thakur Skill University a hawng baw k ang.

(Newsonair)

<><><>